

Banjir tak bermusim

Banyak pokok tumbang ekoran ribut

TIAP kali hujan, ibu negara dan kawasan sekitarnya pasti dilanda banjir kilat. Bertambah buruk apabila hujan yang disertai ribut turut menyebabkan pokok-pokok tumbang di sana sini. Keadaan tersebut berulang lagi petang semalam dengan banyak kawasan di ibu negara ditenggelami air. Malah dalam satu kejadian, sebatang pokok angasa tumbang dan nyaris menghempap tren KL Monorel yang melalui Berjaya Times Square.



SHAHIRIL AZMAN/KOSMO

SEORANG lelaki membantu beberapa pelajar sekolah melintas jalan yang dinaiki air di Jalan Cheras berhadapan pusat membeli-belah Jaya Jusco semalam.

▶ BERITA LANJUT DI MUKA 6



PLAZA Tol Lebuhraya Saga di Batu 9, Cheras yang dinaiki air ekoran hujan lebat semalam.

Ibu negara dan kawasan sekitar dilanda banjir

Pokok tumbang menghempap landasan

Oleh NAN HIDAYAT NAN AZMIE
nan_hidayat@kosmo.com.my

KUALA LUMPUR - "Pada mulanya saya terdengar bunyi kuat seperti 'cakar kucing' di belakang saya, bila toleh saya terkejut melihat sebatang pokok hampir melibas tren yang saya naiki," cerita Imran Noordin, 28, salah seorang penumpang tren KL Monorel yang nyaris dihempap pokok tumbang di Jalan Imbi berhampiran Berjaya Times Square di sini petang semalam.

Dia berkata, ketika itu dia bersama beberapa penumpang lain berada di bahagian belakang tren tersebut, dan dalam perjalanan menuju ke Bukit Bintang untuk bertemu tunangnya, Nadira Wahab, 25. "Mujurlah hati saya terdetik untuk segera menaiki tren itu, jika tidak mungkin lama lagi tunang saya terpaksa menunggu," katanya yang pergi semula ke tempat pokok tumbang bersama tunangnya setelah turun di stesen di Bukit Bintang.

Dalam kejadian pukul 2.55 petang itu, pokok angasa yang dikatakan berusia lebih 25 tahun itu tumbang menghempap landasan monorel tersebut ekoran ribut kuat dan hujan lebat yang melanda ibu kota bermula pukul 2 petang. Penolong Penguasa Balai Bomba

Hang Tuah, Yamin Teko berkata, dua jentera bomba bersama 13 anggotanya segera ke tempat kejadian setelah menerima laporan kecemasan tersebut seminit kemudian.

"Ini merupakan kes kedua landasan monorel dihempap pokok akibat ribut kuat dengan kes pertama berlaku di Jalan Raja Chulan dua tahun lalu," katanya.

Ekoran kejadian itu, bukan setakat khidmat monorel yang terjejas lebih dua jam tetapi Jalan Imbi juga mengalami kesesakan teruk.

Selain pokok tumbang di Jalan Imbi, beberapa kejadian pokok tumbang juga dilaporkan berlaku di Taman Mulia di Bandar Tun Razak.

Bagaimanapun tidak ada mangsa cedera ekoran kejadian tersebut.

Ekoran hujan lebat itu juga menyebabkan ibu negara dan beberapa kawasan sekitarnya turut dilanda banjir.

Antara kawasan paling teruk dinaiki air ialah di sekitar Damansara Damai dekat Sungai Buloh dengan kira-kira 30 kenderaan terperangkap dalam arus deras.

Di ibu negara sendiri beribu-ribu kenderaan terperangkap dalam kesesakan lalu lintas di beberapa laluan utama menuju ke ibu negara. Ada beberapa batang jalan raya tidak dapat dilalui kerana dinaiki air hampir satu meter.

Tinjauan mendapati, Batu 8 dan Batu 9 di Lebuhraya Saga di Cheras dinaiki air dengan beberapa buah kenderaan tersadai.

Jalan di di hadapan pusat membeli-belah Jaya Jusco, Jalan Loke Yew, Lebuhraya Kuala Lumpur-Seremban, Jalan Syed Putra dan Jalan Bangsar pula ditenggelami air hampir setengah meter.

Selain itu, Jalan Shamelin berdekatan Bulatan Pandan, Jalan Sungai Besi berdekatan Pangkalan Tentera Udara Diraja Malaysia (TUDM), Lebuhraya Lingkaran Tengah Dua (MRR2) Taman Connaught, Jalan 8 Kampung Cheras Baru, Jalan Klang Lama, Tol Salak Selatan serta pekan Salak Selatan juga dilanda banjir kilat.

Sementara itu, jurucakap trafik berkata, kesemua laluan ke pusat bandar mengalami kesesakan teruk melebihi tiga kilometer selama beberapa jam.

"Seramai 70 anggota dan pegawai trafik dikerah mengawasi perjalanan di semua laluan terbabit," kata beliau.

Bagaimanapun, jelas jurucakap trafik, tiada kejadian yang tidak diingini dilaporkan kecuali beberapa kenderaan dilaporkan tidak bergerak akibat enjin tidak dapat dihidupkan selepas menempuh laluan yang dinaiki air. Kenderaan mula bergerak pukul 6.30 petang.



POKOK angasa yang tumbang dan menghempap landasan KL Monorel di Jalan Imbi berhampiran Berjaya Times Square.